

সূর্য পোড়া ছাই

BANGLADARSHAN.COM জয় গোস্বামী

# সিদ্ধি, জবাকুসুম সংকাশ

সিদ্ধি, জবাকুসুম সংকাশ  
মাথার পিছনে ফেটে পড়ে  
দপ করে জ্বলে পূর্বাকাশ  
(...?) মাথায় রক্ত চড়ে  
সিদ্ধি, মহাদ্যুতি-তার মুখে  
চূর্ণ হয় যশের হাড়মাস  
হোমাগ্নিপ্রণীত দুটি হাত  
আমাতে সংযুক্ত হয়, বলে:  
বল তুই এই জলেস্থানে  
কী চাস? কেমনভাবে চাস?  
আমি নিরন্তর থেকে দেখি  
সূর্য ফেটে পড়ে পূর্ণ ছাই  
ছাই ঘুরতে ঘুরতে পুনঃপুন  
এক সূর্য সহস্র জন্মায়  
সূর্যে সূর্যে আমি দেখতে পাই  
ক্ষণমাত্র লেখনী থামছে না  
গণেশ, আমার সামনে বসে  
লিপিবদ্ধ করছেন আকাশ  
চক্রের পিছনে চক্রাকার  
ফুটে উঠছে ব্রহ্মাজগৎ  
এ দৃশ্যের বিবরণকালে  
হে শব্দ, ব্রহ্মের মুখ, আমি  
শরীরে আলোর গতি পাই  
তোমাকেও এপার ওপার  
ভেদ করি, ফুঁড়ে চলে যাই...

BANGLADARSHAN.COM

# তারাখণ্ড সমুদ্রে পড়েছে

.....তারাখণ্ড সমুদ্রে পড়েছে

তার আগে আকাশে লম্বা আগুনের ল্যাজ-একপলক

তার আগে ঝলকে সাদা গাছপালা ভূখণ্ড পাহাড়-একপলক

উড়তে উড়তে ফ্রিজ করছে সরীসৃপ পাখি

পৃথিবী ধ্বংসের ঠিক একপলক দেরি

মৃত্যুর আগের স্বপ্নে এই দৃশ্য ফিরে আসে, সেই থেকে, সব

পাখিদেরই

[সম্পর্ক: প্রাচীন উল্কা: ডাইনোসর বিলুপ্তি]

## সমুদ্র? না প্রাচীন ময়াল?

BANGLADARSHAN.COM

সমুদ্র? না প্রাচীন ময়াল? পৃথিবী বেষ্টন করে  
শুয়ে আছে।

তার খোলা মুখের বিবরে

অন্ধকার। জলের গর্জন।

ঐ পথে

সমস্ত প্রাণীজগৎ নিজের অজান্তে গিয়ে ঢোকে

তুমি ওই বনের সীমায়

গাছে পিঠ রেখে বসে প্রাণত্যাগ করার মুহূর্তে

চোখ স্থির করছো সেই ময়ালের জ্বলজ্বলে চোখে

এতদিন পর

দেখছো সে আসলে অন্ধ। চোখ দুটো নুড়ির, শুধু

জ্যোৎস্না লেগে ঝকঝক করে

দেখছো যে স্রোতের ওই গর্জন আসলে এক

জিভকাটা স্বর

দেখছো, তার মুখের গহ্বর

সীমাহীন কালো-কিন্তু দুটো একটা তারা ভেসে আসে

# আমার স্বপ্নের পর স্বপ্ন হল আরো বেলা যেতে

আমার স্বপ্নের পর স্বপ্ন হল আরো বেলা যেতে  
আমাকে ধ্বংসের পর ধ্বংসক্ষেত্রে বর্ণনার শেষে  
শান্তি নেমে চলে গেল, মৃতদেহ টপকে টপকে, দূর  
তেপান্তরে...

তার, গা থেকে স্ফুলিঙ্গ হয়ে তখনও ঝলক দিচ্ছে  
রক্ত আর উল্লাসের ছিটে।

দিগন্তে মেঘের কুণ্ড। থেমে থাকা ঝড়...

আমাকে দৃশ্যের পর দৃশ্যের ওপিঠে

এইমতো ঐকে রাখছেন

এক মুণ্ডহীন চিত্রকর!

BANGLADARSHAN.COM

## জ্বলতে জ্বলতে পাখি পড়ছে

জ্বলতে জ্বলতে পাখি পড়ছে

জ্বলে 'ছ্যাৎ' আওয়াজে আমার

ঘুম ভাঙে

কোটি কোটি যুগ পরেকার

ঘুম,

যার মাথার ওপরে

হাঁ করা আকাশগর্ত, লৌহমেঘ, আর

তার নিচে, ঘুরতে ঘুরতে, ক্রমশ তলিয়ে যাওয়া পৃথিবীর

নিঃশব্দ চিৎকার।

# আমি তো আকাশসত্য গোপন রাখিনি

আমি তো আকাশসত্য গোপন রাখিনি  
খুলে দ্যাখো পাখির কঙ্কাল।  
নীচের প্রান্তরে উড়ত পাখি ও পাখিনী  
অনেক উপরে ঢালু বাটির মতন শূন্য ধরে  
আমি তার ছায়াচিত্র তুলে রাখতাম।  
এ দৃশ্য যে দেখেছিল তার মধ্যে থেকে আজ আর  
আলো অন্ধি বেরোতে পারে না।  
সেখানে দিবস রাত্রি নেই, শুধু জমে থাকা  
থলথলে অন্ধকার সময় একতাল।  
তার চারদিকে আজ শেষ হয়ে যাওয়া  
জ্যোতিষ্ককোটর ভরা ছাই।  
আমি দীর্ঘাকার প্রভা নিয়ে  
তার বৃত্তপথ থেকে, ধীরে ধীরে, দূরতম শূন্যে সরে যাই...

BANGLADARSHAN.COM

## তুমি কি বিশ্বাসহতা

তুমি কি বিশ্বাসহতা? না, তুমি বিশ্বাসী?  
তোমার পিছনে ঘুরছে জাঁতা ও আগুনচক্র  
তোমার সম্মুখে উড়ছে সোনার পতঙ্গ আর ডানামেলা বাঁশি...  
মাঝখানে অশ্বখগাছ। মাঝখানে দড়ি আর ফাঁসি।

# নৌকো থেকে বৈঠা পড়ে যায়

নৌকো থেকে বৈঠা পড়ে যায়

জলের তলায়

কালো ছাইরঙা জল একবার ঢেউ দিয়ে অন্ধকার

এখন কোথায় আছে সেই বৈঠাখানি?

দুটো কৌতুহলী মাছ, দু' খণ্ড পাথর, লঙ্কর, সাইকেল ভাঙা

গোল আংটির পাশে পঁাকে গাঁথা চারানা আট আনা। অন্ধকারে

ওদের চোখ জ্বলে। এই জলে থেকে থেকে

এখন ওরাও কোনো প্রাণী।

হরানো বৈঠার কাছে পৌঁছে দেখি, তার

দুধারে জন্মেছে পাখনা, পিঠে কাঁটা, নাকে খড়া, আর

খড়োর রজ্জুর সঙ্গে বৃহৎ নৌকাটি বেঁধে নিয়ে

বৃষ্টিতে বৃষ্টিতে ঝাপসা জলমগ্ন ভূমণ্ডল পেরিয়ে সে চলেছে

আবার!

BANGLADARSHAN.COM

## এই শেষ পায়রা

এই শেষ পায়রা। এই শেষ

শান্তির পতাকা। ঘাড়ে পোঁতা। কিন্তু তার

ছুঁচালো লোহার দণ্ড ঘাড়ে ঢুকে থামে না—এগোয়।

খোঁজে শিরদাঁড়া—ইলেকট্রোড।

পায়। ছোঁয়। গর্ত করে

আর দিন চলে যায় শতলক্ষ বছরের পার

তারপর যারা আসে, তারা দেখে বসে আছে

একটু মনুষ্যমূর্তি, কাঁধে পাখি—

দুজনই অঙ্গার!

# ওরা ভস্মমুখ

ওরা ভস্মমুখ। ওরা নির্বাপিত। ওরা  
ধূম্রনাসা কাঠ  
অনেক পাঁকের নীচে আধপোড়া কাঠ হয়ে ওরা  
পালিয়ে ঘুরেছে কতক্ষণ।  
এক একটি ক্ষণের সঙ্গে এক এক শতক পার হল  
এখন আমার কাজ ওদের বিছানাগুলি খোঁড়া  
ওদের সযত্নে শুইয়ে গায়ে চাপা দেওয়া  
চাদর কম্বল নয়-মাটি  
ওরা মা বাবার মতো। ওদের অস্থির খোঁজ পেতে  
শত শত গোর গর্ত বাঙ্কার ফব্ব-হোল খুঁড়ে খুঁড়ে  
তাই এত ক্রোধ কান্না শোক ভস্ম ঘাঁটি।

BANGLADARSHAN.COM

## তাত লেগে চোখ খুলল

তাত লেগে চোখ খুলল। বালিস্তুর ঠেলে  
বেরিয়ে এলাম। পাহাড় তুষারহীন  
গাছেরা দণ্ডায়মান কাঠ  
জনপদ লোহা ইট কংক্রিটের কালো স্তূপ মাটি  
ফ্যাকাসে হলদেটে সূর্য বিরাট চাকার মতো ছড়িয়ে রয়েছে  
৭০০ কোটি বছরের পরের আকাশে  
সমস্ত জ্বালানি পুড়ে শেষ।  
বালির সমুদ্রখাতে আমি হাত জোড় করে দাঁড়াই  
আমার কপালে এসো, ঝরে পড়ো,  
রৌদ্র নয়-সূর্য-পোড়া ছাই!

# ওই কালস্রোত

ওই কালস্রোত। আমি  
সিমেন্ট বাঁধানো পাড় থেকে  
হাত ডোবাই।  
আমার আঙুল গলে যায়। কজি, বাহু  
গলে যায়। ঘাড়ের উপরে মুণ্ডু নিয়ে  
আমি হাত-পা-কাটা জগন্নাথ  
নদী-নালা আঁকা এক ঘুরন্ত বলের পিঠে  
বসে থাকি।  
শূন্যে পাক খাই।

BANGLADARSHAN.COM

## রেণু মা, আমার ঘরে তক্ষক ঢুকেছে

রেণু মা, আমার ঘরে তক্ষক ঢুকেছে  
তক্-খো, তক্-খো-তার ডাক  
রেণু মা, সংকেতগাছ দূরে দাঁড়িয়েছে  
জ্যোৎস্না লেগে পুড়ে গেছে কাক  
আমি সে-গাছের ডালে, দড়ি ভেবে, সর্প ধরে উঠি  
সর্প থেকে বিষ খসে যায়  
রেণু মা, তোমার হাতে তালি বাজে-রাতের আকাশে  
ডানা মেলে জ্যোতির্ময় তক্ষক পালায়

## অন্ধ চলেছেন

অন্ধ চলেছেন। খঞ্জ, চলেছেন। লাঠি  
পুরনো বন্ধুর মতো চলেছে তাঁদের সঙ্গে।  
হাত কাটা। ন্যাড়া মাথা। ঘেয়ো।  
অষ্টাবক্র। ব্যাণ্ডেজ জড়ানো  
চাকাঅলা কাঠের বাক্সের মধ্যে সেবা—  
সকলকে নিয়ে এই ধীরগতি মিছিলও চলেছে  
অতিকায় মেঘের চাঙড় ফেটে ফেটে  
গনগনে অস্তরশিা বেরোচ্ছে তখন  
ঢাল বেয়ে ঢাল বেয়ে সকলেই ওই  
চুল্লির ভিতরে নেমে যেতে  
ব্যাণ্ডেজ, কাপড়, কাঠ, চাকা, ক্ষয়গ্রস্ত হাড়, আর  
খণ্ড খণ্ড না-মেটা বাসনা

কতরকমের সব রঙিন পালক হয়ে ছিটকে ছিটকে উঠেছে আকাশ  
আমলকীতলার মাঠে, এখনো একেকদিন, সেইসব রঙ ভেসে আসে

## মাঠে বসে আছে জরদগব

মাঠে বসে আছে গরদগব।  
মাথায় পাহাড়।  
সামনের থালায় মাটি। তৃণ।  
সে খায়, থালায় গর্ত খুঁড়ে—  
দইয়ের ভাঁড়ের মতো কেটে কেটে নামে—  
আর ক্ষিদে শেষ হয় না—খনিজ সম্পদ  
কমে আসে, আরো কম—সুডুৎ চুমুকে  
জমানো তেলের গর্ভ খালি হয়ে যায়  
কাদা-ঝোল মাথা হাতে, জরদগব, থাকা মনে ক'রে  
খালি ফুটো পৃথিবী বাজায়!

# বালি খোঁড়ে আমার বৃশ্চিক

বালি খোঁড়ে আমার বৃশ্চিক—

রৌদ্রে তার অসুবিধা হয়।

হাওয়ার, লোকের চাপে, বালি সরলে

সে বেরিয়ে আসে।

কাঁপাকাঁপা পায়ে

তটের পাথর খুঁজে তার নীচে সুড়ঙ্গ বানায়

শুধু রাত্রিবেলা তার আদিগন্ত ছড়ানো শরীর

ভেসে ওঠে সমুদ্রের উপর-আকাশে

তারকা নির্মিত দাড়া, অগ্নিময় দুটি পুচ্ছ-হুল

খেয়ালখুশিতে সে নাড়ায়

বসতি ঘুমোয়, শুধু জগতের সকল সমুদ্র যাত্রা থেকে

নাবিকরা তাকে দেখতে পায়।

BANGLADARSHAN.COM

## তোমার পুরুষমুখে কাঁধ

## অবধি ঢুকিয়ে ছিলাম

তোমার পুরুষমুখে কাঁধ অবধি ঢুকিয়ে ছিলাম

এখন আঙুরা-কালো কাঠকয়লা থেকে

বাষ্প উড়ছে। সবদিকে মাথা দিয়ে টুঁসো মারি,

বাতাসের অদৃশ্য দেওয়াল ফেটে ফেটে

গলগল আগুন ওঠে।

ও নিয়তিপুরুষ, এরপর

অর্ধেক সিংহের রূপে তোমার বিপুল অবয়ব

থাম ভেঙে একদিন আমার জানুতে আছড়ে পড়ে—

আমার কলমে, নখে, ছিন্নভিন্ন হয়।

# প্রেতের মিলননারী নেই

প্রেতের মিলননারী নেই।

সে তাই চন্দ্র ও সূর্য দুটি হাত রেখে

ক্রিয়াশীল আগ্নেয়গিরিকে ভেদ করে

পৃথিবীর সঙ্গে মিলতে চায়—

জিহ্বাহীন মুখ থেকে অতৃপ্ত রমণশব্দ

মেঘ ফেটে গেলে—শোনা যায়।

## তোমাকে কাদার মধ্যে

### কাদাপাখি মনে করলাম

BANGLADARSHAN.COM

তোমাকে কাদার মধ্যে কাদাপাখি মনে করলাম।

মাছ খুঁজছ? লম্বা সরু ঠোঁট দিয়ে আমার

খাবার জোগাড় করছ বুঝি?

ওগো ও জননী পাখি, আমি স্বপ্নে ডাকি

তোমার মা নাম

তোমার জরায়ু-কলসী এখন তো শুকনো, শুধু বালিমাটি ভরা

বুড়ি, তবু আমাকে একবার, হাত পা মুড়ে

তোমার ডিমের মধ্যে শুয়ে থাকতে দেবে?

# গাছের জন্মানুক

গাছের জন্মানুক।

দীপ, জন্ম থেকে গাছ।

দীপজন্মে যাই আমি-চোখ বাঁধা-

মাথায় শিখার তীব্র নাচ।

# কূর্ম চলেছেন

কূর্ম চলেছেন। তাঁর পিঠ থেকে হঠাৎ

পৃথিবী গড়িয়ে পড়ে যায়

শূন্যে সে-গোলক ধরতে, ঘুম ভেঙে, শশক লাফায়

আকাশ বাকবাক ওরে ওঠে

শ্বেতশুভ্র একটি উল্কায়

# পশ্চিমে বাঁশবন

পশ্চিমে বাঁশবন। তার ধারে ধারে জল।

বিকেল দাঁড়ায় ধানক্ষেতে।

জলে ভাঙা ভাঙা মেঘ। ফিরে আসছে মাছমারা বালকের দল।

খালি গা, কোমরে গামছা, লম্বা ছিপ, বুড়ি-

আবছা কোলাহল।

তোমার কি ইচ্ছে করে, এখন ওদের সঙ্গে যেতে?

কয়েদি উত্তর দেয় না। সে শুধু বিকেলটুকু

এঁকে রাখছে ঘরের মেঝেতে।

# ভাঙা বাড়ি

ভাঙা বাড়ি। চারদিকে ঘাস।  
এখানে কি কেউ বাস করে?  
জড়বুদ্ধি ক্রোধ, হাহাকার  
জমে জমে পিণ্ড হয় ঘরে  
বন্ধু না—বন্ধুর জ্যান্ত লাশ  
হাত নাড়ে জানলার ভিতরে  
জানলার এপারে লম্বা ঘাস  
পোকামাকড়ের ঝাঁক চলাচল করে!

BANGLADARSHAN.COM

## বাড়িটি আকাশে ফুটে আছে

বাড়িটি আকাশে ফুটে আছে।  
ছাদে ওই বালকবালিকা  
নীচে দড়ি ফেলে ধরছে খেয়ানোকো চাঁদ।  
ক্রমশ গুটিয়ে তুলছে মেঘ থেকে আরো উপরীকাশে  
যা—ওদের কাছে যাবি? বিদ্যুতের মতো নীল কাছে?

# হৃদপিণ্ড–এক টিবি মাটি

হৃদপিণ্ড–এক টিবি মাটি  
তার উপরে আছে খেলবার  
হাড়। পাশা। হাড়।  
হৃৎপিণ্ড, মাটি এক টিবি  
তার উপরে শাবল কোদাল চালাবার  
অধিকার, নিবি?  
চাবড়ায় চাবড়ায় উঠে আসা  
মাটি মাংস মাটি মাংস মাটি–  
পাশা। হাড়। পাশা।  
দূরে ক্ষতবিক্ষত পৃথিবী  
জলে ভেসে রয়েছে এখনো–  
তাকে একমুঠো, একমাটি  
হৃদপিণ্ড, দিবি?

BANGLADARSHAN.COM

# পোকা উঠেছে

পোকা উঠেছে। গাছের কাণ্ডের গায়ে পোকা।  
ধানবীজ হাতে ঢেলে ফুঁ দিয়ে উড়িয়ে দেখছে ধুতি ও ফতুয়াপরা চাষি  
হাবলা গোবলা ছেলে দৌড়ে নেমে আসছে ঢালু পিচরাস্তা থেকে  
ওরে পড়ে যাবি, ওরে পড়ে যাবি, ডাকতে ডাকতে আমি  
বল্লীকের স্তূপ ভেঙে সমাজ সংসারে ছুটে আসি

## কিন্তু আগুনের মধ্যে গিয়ে দাঁড়াবার কথাটা মনে থাকে যেন

কিন্তু আগুনের মধ্যে গিয়ে দাঁড়াবার কথাটা মনে থাকে যেন!  
মাটি ফেলে তলিয়ে যাবার কথাটা  
যেন মনে থাকে ভূমিকম্পের ফাটল থেকে হাত বেরিয়ে আসা  
আর মরুভূমিতে দাঁড়িয়ে, ডিঙি মেরে,  
সূর্যের পেটে মুখ ঢুকিয়ে দেওয়া  
কয়েক যুগ পরে, সূর্য নিভে আকাশ থেকে খসে পড়ল যখন  
তখন, আর কিছু না পেয়ে, খিদের চোটে, পরস্পরকে  
খেয়ে নিশ্চিহ্ন করে ফেলবার কথাটাও মনে থাকে যেন...

# স্নান করে উঠে কতক্ষণ

স্নান করে উঠে কতক্ষণ

ঘাটে বসে আছে এক উন্মাদ মহিলা

মন্দিরের পিছনে পুরনো

বটগাছ। ঝুরি।

ফাটধরা রোয়াকে কুকুর।

অনেক বছর আগে রথের বিকেলে

নৌকো থেকে ঝাঁপ দিয়ে আর ওঠেনি যে-দস্যি ছেলেটা

এতক্ষণে, জল থেকে

সে ওঠে, দৌড় মারে, ঝুরি ধরে খুব দোল খায়

সারা গা শ্যাওলায় ভরা, একটা চোখ মাছে খেয়ে গেছে

কেউ তাকে দেখতে পায় না, মন্দিরের মহাদেবও তুলছে গাঁজা খেয়ে

সেই ফাঁকে, এরকম দুপুরবেলায়—

সে এসে মায়ের সঙ্গে মাঝে মাঝে দেখা করে যায়।

BANGLADARSHAN.COM

## আজ কী নিশ্চিত কী বিদ্যুৎ

## কী হরিণ এই দৌড়

আজ কী নিশ্চিত কী বিদ্যুৎ কী হরিণ এই দৌড়

কী প্রান্তর, কী উড়ে যাওয়া ধুলো এই হাত

কী ময়ূর এই নৃত্য

কী কূপ কী বন্ধ কী জিভ-বেরিয়ে-পড়া এই ঈর্ষা

কী অবধারিত কবর সব গর্ত

আর পশ্চাদ্ধাবনরত পিশাচদের কী হঠাৎ তলিয়ে যাওয়া

আজ কী সম্রাজ্ঞী এই ছন্দ

শয়তানও যাকে কেনবার কথা কল্পনা করে না

# ওই যে বাড়ির তীরে কবর ওঠানো তার

ওই যে বাড়ির তীরে কবর ওঠানো তার  
ছায়াচরে ঘুমে শুরু হই  
আমার অতীতকাল জলে ডাক দিল; ‘ওরে  
লগ্নে লগ্নে ফেরী ছেড়ে যায়’  
গৃহমুণ্ডে যে-বায়স নুড়িমুখে বসে তার  
‘কা’ ধ্বনিত সিকাল অজ্ঞান  
খেলনা দুর্গের সামনে যতবার হাবাখেলা  
উত্থাপন করি, বাজে টাকা  
যতই পালাতে যাই, ছাদ ভেঙে মাথায় পড়ে  
ততবার হতভাগ্য যশ  
সখার আঙুল শুষে পদিনী খেলেন, ফলে  
তুমিও ঝিনুকে ঢুকে খুন  
মা বাবার সঙ্গে বসে বশবর্তী এ কবিতা  
সকাতরে পড়া অসম্ভব  
ওই যে উঠোন থেকে গৃহরক্ত বয়ে আসে  
সবার দরজায় কাদা, পা পিছলে আসুন  
রাস্তায় পলায়মান ভবিষ্যৎকাল, আর  
হাত পায়ে বেড়ি আর পিছনে কুকুর  
কালপুরুষের কাঁধে উড়ে বসে কাক, সেও  
তারা ফেলে ফেলে ভরছে ব্রহ্মাণ্ড কলস  
ওই যে ছায়ার তীরে শোয়ানো কবর, তার  
বাড়ি-তীরে বালি ঝুরঝুর  
পূর্বের আকাশ, মত্ত, পাশে এসে দাঁড়ালেন  
ও আমার ভয় ভেঙে চুর

BANGLADARSHAN.COM

বাদুর বৃষ্টির মধ্যে দেবদারু

গাছ ছেড়ে যায়

বাদুড় বৃষ্টির মধ্যে দেবদারু গাছ ছেড়ে যায়

বাদুড় আমার রক্ত খেয়ে

আকাশে পালায়

পালিয়ে বাঁচে না

রাত্রে দেখা যায়

বাদুড় চাঁদের মধ্যে হুমড়ি খেয়ে পড়ে

পেট থেকে রক্ত, রক্ত নয়, বালি ওগরায়

BANGLADARSHAN.COM

হে অশ্ব, তোমার মুণ্ড

হে অশ্ব, তোমার মুণ্ড

টেবিলে স্থাপিত। রাত্রিবেলা

হাঁ করা মুখ থেকে

ধোঁয়া বারে

আর সে-ধোঁয়ার মধ্যে চতুষ্পদ কবন্ধ তোমার

সারারাত ছুটোছুটি করে!

# নিজের ছেলেকে খুন ক'রে

নিজের ছেলেকে খুন ক'রে  
ঐ দেখ, চলেছে অভাবী  
নিজের মেয়েকে বিক্রি ক'রে  
ঐ ফিরে যাচ্ছেন জননী  
ওদের সঞ্চয় থেকে ফেরায় রাস্তায় পড়ে যায়  
অশ্রুর বদলে বালি, পয়সা ও রক্তের চাকতি-গোল  
তারপর সমস্ত জল। শুধু ওই গোল গোল পাথরে  
আগুন ধকধক করবে একদিন, আর সেই আগুনে পা ফেলে  
ক্রোধ শোক দক্ষ এক জলে ডোবা দেশ  
পুনরায়, খুঁজে খুঁজে বেড়াবে পাগল

## একটি শেষমুহূর্তের নারীসিন্ধুতট

একটি শেষমুহূর্তের নারীসিন্ধুতট  
অন্যটিতে আরম্ভের ডানা ছড়ানো ঙ্গল  
হেঁ মেরে ওঠে আবার, তার নখে সরীসৃপ  
পায়ের গোছে শিকল  
একটি শুভ আরম্ভের মাস্তুলিক ঘট  
ঘটের নীচে সাপের চোখ, মণি  
বুড়ো আঙুল কেটে দেওয়ার পরেও বাকি থাকে  
কলম, তর্জনী  
মাটির কান, মাটির নীচে রক্ত চলাচল-  
ভূগর্ভের হৃদয় নড়ে-ওষ্ঠ? নড়ে তা-ও!  
দুঃখ তার কণ্ঠা স্কুর দিয়ে  
ফাঁক করেছে-খাও

# আর কারো ময়ূর যাবে না

আর কারো ময়ূর যাবে না  
আমার সম্পূর্ণ খাতা-সাপ  
এবার যে 'দ' আকার বাজ পড়ে, তাতে  
সাপগুলো দন্ধ পুড়ে বলসে ঐকৈবেঁকে  
জীবন পেয়েছে  
ওদের আমি খালে বিলে পাহাড়ে জঙ্গলে  
ছেড়ে দিই, ওদেরকে দেখে ময়ূরেরা  
ধরফর দৌড়য় আর দেহ থেকে শত শত চোখ  
খসে পড়ে  
রাত্রিবেলা আমার খাতায়  
মাতা তোলে হানাবাড়ি, চাঁদ  
দেখি তার ছাদে ও পাঁচিলে  
বাটপট লাফিয়ে উঠছে ওইসব বাঁঝারা ময়ূর

BANGLADARSHAN.COM

# অন্ধকার আকাশবাতি

অন্ধকার আকাশবাতি  
এই সড়কে নয়ন  
ফাটল, খাদ, গর্ত-সব  
ধসে পড়ার সুযোগ  
পার ক'রে আর মাটির ওপর  
ফুটে বেরোনো দাঁত  
ব্যর্থ ক'রে, নিশিজাগর,  
জলের নীচে শয়ন!  
জলে তৈরী সড়ক, তাতে  
আকাশবাতি ফেলে  
রাস্তা দ্যাখে অন্ধ-পাশে  
এক সন্ধ্যাকাশ  
দুই সঙ্গী হাঁটে, তাদের  
গমনপথ থেকে  
কাঁটা, কামড়, গরল আদি  
গুপ্তকীট নাশ!

## জল থেকে ডাঙায় উঠে ওরা

জল থেকে ডাঙায় উঠে ওরা  
পালিয়ে চলেছে আজীবন  
এক যুগ থেকে অন্য যুগে  
উড়ে আসে ক্ষেপনাস্ত্র, তীর  
ছেলে বউ মেয়ে বুড়ো জননী ও শিশু কোলাহল  
দাউদাউ উদ্ভাস্ত্র শিবির

# সমুদ্র তো বুড়ো হয়েছেন

সমুদ্র তো বুড়ো হয়েছেন  
পিঠের ওপরে কতো ভারী দ্বীপ ও পাহাড়  
অভিযাত্রী, তোমার নৌকাই  
খেলনার প্রায়  
সংকোচ করো না তুমি, ওইটুকু ভার  
অনায়াসে সমুদ্রকে দিয়ে দেওয়া যায়!

# শিরচ্ছেদ, এখানে, বিষয়

শিরচ্ছেদ, এখানে, বিষয়।  
মাটি তাই নরম, কোপানো।  
সমস্ত প্রমাণ শুষ্ক ভয়  
কখনো বোলো না কাউকে কী জানো, বা, কতদূর জানো।

# স্তুপের তলায় রাখো ঘাসলতাপাতা

স্তুপের তলায় রাখো ঘাসলতাপাতা  
এনেছি বলির পশু, ছাগ  
সে ভুলে গিয়েছে তার গত শিরচ্ছেদ  
অথচ গলায় তার  
এখনো মালার মতো দাগ

# ক্ষুধার শেষ ক্লান্তি, ক্ষার, ঘুমের শেষ জল

ক্ষুধার শেষ ক্লান্তি, ক্ষার, ঘুমের শেষ জল—  
যুদ্ধ, শেষ-খেলা  
শেষরক্ত আকাশে পড়ে-রক্ত খেয়ে খেয়ে  
সূর্য লাল ঢেলা  
গোলায় পোড়া শহর, গাছ, পতাকা দিয়ে ঢাকা—  
বিকেলবেলা কামানে নীল রঙ  
সারাদিনের শিকার শেষ-আকাশে বেরিয়েছে  
বেলুন হাতে, দেবদূতের সঙ।

## দুখানি জানুর মতো খোলা

দুখানি জানুর মতো খোলা  
হাড়িকাঠ  
মুখ রাখো তাতে

চোখের পলক ফেলতে মাথা ছিঁটকে চলে যাবে সামনের মাঠে

## রাস্তায় পড়েছে ব্রিজ—জল নেই—বালি

রাস্তায় পড়েছে ব্রিজ—জল নেই—বালি  
রাস্তায় পড়েছে শুকনো ধুলো ও আগাছা ভরা বিরাট হাঁদারা  
শ্মশান? পড়েছে তাও—  
চিতায় চাদর ঢেকে শুনেছিল যারা  
তারা কাজে বেরিয়েছে প্রান্তরে, কামান গাড়ি ঠেলে  
হঠাৎ কোথায় হাওয়া? চাপাচুপি খড়ের নিঃশ্বাস?  
কবরে, বোমার গর্তে ঝুঁকে ঝুঁকে দেখি  
মা, আর মায়ের হাতে মুখ চাপা অনাথ।

# আমলকীতলার গন্ধে সার বিষণ্ণতা

আমলকীতলার গন্ধে সার বিষণ্ণতা

বেতাল যে-গাছে থাকে সে-গাছের পাতাও নড়ে না

আমলকীতলার গন্ধে শোকপোড়া আলো

বেতাল আকাশপথে জোনাকি কুড়িয়ে হেরে ভূত

মরা মুখ উঠে এল রাতের জানলার বিপরীতে

আমলকীতলার বায়ু, সে ধায়, উনপঞ্চাশ দিকে

ধাক্কায় ফেলেছে তাকে জানলা থেকে খাড়া নর্দমায়

মাব্বখানে পৃথিবী ঘোরে, সূর্য দাঁতে কামড়ে ঘোরে বায়ু।

আমার একাকী মুখে জ্যোতিশ্চক্র বিদ্যুৎ ছেটায়

দ্বিখণ্ডিত করে দিয়ে উদয়অস্তের মধ্যভাগ

রক্ত ও আনন্দমাখা কবি হন পুনর্জাগরিত

পাড়ার লোকের তাতে বিস্ময় কাটে না, গালে হাত

আলোচনা করে তারা: আরে, আরে—কই

এ তো তেমনই বজ্জাত আছে—রোদবৃষ্টি খেয়ে ফেলছে

গাছপালা উড়িয়ে নিচ্ছে আগের মতোই!

BANGLADARSHAN.COM

# মা এসে দাঁড়ায়

মা এসে দাঁড়ায়

জানালায়

নিম্নে স্রোত, নদী

জল থেকে লাফিয়ে উঠছে এক একটা আগুনজ্বলা সাপ

আমি সে-নদীর থেকে তুলে নিতে আসি

আমি শিকলবাঁধা বাঁশি

আকাশের উঁচু জানলায়

মা এসে দাঁড়ায়

সরে যায়।

BANGLADARSHAN.COM

## ঘরে রাধাবিনোদ আকাশ

ঘরে রাধাবিনোদ আকাশ

বুলনের চাঁদটি মেঝেতে

বিছানার পাশের লণ্ঠন

তার শুধু চক্ষু দপ্‌দপ্

অমাবস্যা পূর্ণিমা সড়ক

ফালাফালা ক'রে সারারাত

সে খুঁজে বেড়াচ্ছে একফালি

কবিতা লেখার যোগ্য শব্দ!

# অতীতের দিকে উঠে চলে

অতীতের দিকে উঠে চলে  
যুদ্ধ শব, হাজার হাজার  
শিখরের উপরে তুষার  
তাদের পিছনে আলো জেলে  
বসে আছে ছোট ছোট বাড়ি  
স্বামীপুত্র হারানো সংসার

BANGLADARSHAN.COM

## আমাকে প্রত্যেকবার কেটে

আমাকে প্রত্যেকবার কেটে  
পশুরক্ত পাওয়া যাবে-পর্বতচূড়ায়  
পা থেকে আমার ধড় উল্টো করে ঝুলিয়ে রাখলেই  
পাখিরা চিৎকার করবে-লাল হবে আকাশ  
সমুদ্রের জলে  
আমার মহিষমুণ্ড, বেঁকে যাওয়া শিঙ  
দেখা দেবে সূর্যের বদলে!

# আমলকীতলার নীচে মায়ের হাতের সাদা শাঁখা

আমলকীতলার নীচে মায়ের হাতের সাদা শাঁখা  
ভেঙে পড়ে আছে—পাশে নতুন ইস্কুল বাড়ি ওঠে  
ঘাট থেকে বাড়ি ফিরছে শ্রদ্ধের একান্নবর্তী দল  
পুরাতন স্বামীহারা বেড়া থেকে উঁকি দিয়ে দ্যাখে  
নতুন বিধবামূর্তি কার?

গিরগিটি দৌড়য়, সামনে পুরনো বাড়ির হাড়গোড়  
মরা গাছ, তার গায়ে বিষাক্ত পিঁপড়ের সারি নামে

ওখানে শ্মশানে বসল দশ বছর আগে

পথে পড়ে বাবলাফুল, ধামা ও কম্বল

আমলকীতলার নীচে আঁকমগ্ন নতুন পড়ুয়া

ঘাসের ওপরে

মায়ের হাতের ভাঙা শাঁখা—

তাতে শুভ্র রোদ্দুর পড়েছে

## জননী এই আঙিনা

জননী এই আঙিনা—আজ

শরীর বটচারা

বাতাস পথবালক, আর

মেয়েটি লণ্ঠন!

# কী দুর্গম চাঁদ তোর নৌকার কিনারে গেঁথে আছে

কী দুর্গম চাঁদ তোর নৌকার কিনারে গেঁথে আছে!  
অন্যদিকে কী সুন্দর মাঝি!  
যার মুখ কঙ্কালের, যার বাহু জং-ধরা লোহার।  
বল, তোর মাঝিকে বল, শুরু করতে লৌহের প্রহার।  
অত যে দুর্মূল্য চাঁদ, সেও তো সুলভে ভাঙতে রাজি!  
খণ্ডে খণ্ডে জলে পড়ছে, জল ছিটকে উঠছে দূরে কাছে...  
বল তোর ইচ্ছা হয় না সেই দৃশ্যে দাঁড়াতে আবার  
ওই উল্কাগুলি খেতে জলরাশি সরিয়ে যখন  
রান্ধুসে মাছের মুখ ভেসে উঠবে জলদেবতার?

BANGLADARSHAN.COM  
মার? সে তো জানলার ওপারে এসে বসে

মার? সে তো জানলার ওপারে এসে বসে  
হাত ভাঙ। চুমুক দিতেই  
তার স্বচ্ছ গলা দিয়ে নামে  
গলে যাওয়া নীহারিকা, চ্যাপ্টা সূর্য, বিন্দু বিন্দু চাঁদ—  
তার শিরা উপশিরা বেয়ে  
বইতে থাকে পুরো ছায়াপথ  
সে যখন জানলা ছেড়ে যায়  
ধোঁয়ার স্রোতের মধ্যে উল্টেপাল্টে ঘরে এসে ঢোকে  
অতীত—তালগোল পিণ্ড—পিণ্ডের মতন ভবিষ্যৎ!

# স্বপ্নে মরা ময়ূর

স্বপ্নে মরা ময়ূর, তার  
গায়ে চাঁদের আলো  
কার্নিশের ফণীমনসা  
ছাদের কোণে ঘর  
কাঁটায় বেঁধা কতকালের  
শুকোনো সব পাখি  
ওদের গলায় ফিসফিসোয়  
বাতাস, ডাক, স্বর  
মরা ময়ূর দাঁড়িয়ে-গায়ে  
ফুটফুট জোনাকি  
শিকল গৈঁথে ঝোলানো চাঁদ,  
পেণ্ডুলাম, কালো  
হেলানো গাছ, গলতে থাকা  
ইটকাঠের বাড়ি  
স্বপ্নে মরা ময়ূর, তার  
স্পষ্ট চোখ, খোলা

BANGLADARSHAN.COM

# কাঠের ছাগল আর কাঠের মহিষ

কাঠের ছাগল আর কাঠের মহিষ—জ্যাস্ত হল।

খটখট লাফাঝাঁপি, খাট ও টেবিল ঘিরে বাঁধ—

মুখ নিচু ক’রে ওরা মেঝেতে স্ফুলিঙ্গ পান করে

পা নামাই খাট থেকে—মোজাইকে সূর্য দেখা দেয়

রক্তাভ কটাহে দু পা, ত্রুশে বেঁধা দুটি হাতে ডানার ফোয়ারা

আমি, জানলা দিয়ে বেরিয়ে এলাম

নীচে দূর মর্ত্যলোকে—কাঠের মহিষ, ঘোড়া, কাঠের মেঘকূল

তাদের পায়ের নীচে ঘূর্ণমান—রক্তবর্ণ লোহার প্রান্তর

BANGLADARSHAN.COM

## আমার মায়ের নাম বাঁকাশশী

আমার মায়ের নাম বাঁকাশশী, আমার শ্যামের নাম ছায়া

আমার তরঙ্গ মানে খোলা বাড়ি—ছাদ থেকে যার

নীচে পড়ে হানাহানি খেলা—

আমার সম্পূর্ণ ভুল চাই আকাশ খুঁড়লে বালি

আমার বাবার মুখে পান, গায়ে চাদরে উল্কারা সরে যায়

মা, নীচে, সমুদ্রে খসে পড়ে।

# হিংসার উপরে কালো ঘাস

হিংসার উপরে কালো ঘাস  
নীচে হাড়, মাটি জমা খুলি  
কারোর জানার কথা নয়  
মালসার মতো গোল পৃথিবী মুখে কাছে ধ'রে  
ভেতরের হাড় মাটি কয়লা তেল লোহা  
ফেলে দিয়ে, ফাঁকা ওই করোটিতে আমি রাত্রিভোর  
সশব্দ খাঁকারে রক্ত, দমকে দমকে রক্ত, ফেলি  
তলায় আকাশ বয়ে যায়

BANGLADARSHAN.COM

শান্তি শান্তি শান্তি শান্তি যখন

সোনালী পাগলিনী

শান্তি শান্তি শান্তি শান্তি যখন সোনালী পাগলিনী  
তীরে বসে বসে খায় সূর্যাস্ত একের পর এক  
হা সমুদ্র জলরাশি শুকিয়ে রক্তাভ বালিখাত  
পিছনে শহর মরা ইটকাঠ ইটকাঠ স্তূপ  
ভোর দ্বিপ্রহর ধ্বংস, সন্ধ্যা বা নিশীথকাল শেষ  
বাতাসে গর্জনশীল সোনাগুঁড়ো বালিগুঁড়ো শুষে  
শান্তি শান্তি শান্তি ডাকে তীরে যে-সহিংস পাগলিনী  
সূর্যেরা কেবলই অস্তে চলে তার গণ্ডুশে গণ্ডুশে...

# তমসা, আমার সীমা জল

তমসা, আমার সীমা জল  
জলের উপরকার চরে  
একদিন বসেছিল পৃথিবীর মতো ভারী পাখি  
ভূমিতলপিণ্ড তার চাপ  
এতদিনে গলিয়ে দিয়েছে  
যা গলেনি  
ভূমির সমান ভারী পাপ  
তার নীচে চাপা পড়ে আছে  
নখচঞ্চুপালকের ধ্বংস অবশেষ  
তমসা, আমার সীমাতীরে  
এখন অরণ্যকূল, শান্ত গৃহসারি  
স্নান আর কলহাস্য, নৌকা আর সঁতারুর ঝাঁপ  
যাদের অজ্ঞাতসারে রাত্রে মাঝে মাঝে জ্বলে ওঠে  
আমার পিঠের বালি-কাদায় তারকাচিহ্ন—  
দানবপক্ষীর পদচ্ছাপ!

BANGLADARSHAN.COM

## ছাদে জড়ভরত সন্তান

ছাদে জড়ভরত সন্তান। তার গলা  
লম্বা হয়ে জল খেতে যায়  
দূরের পুকুরে  
রাস্তায়, বাদাড়ে নিশি থেকে থেকে ডাকে  
শেষরাত্রে, মেঘের আলপথে  
একটি কঙ্কাল ফেরিওয়ালা  
হেঁকে যায়: চাই, দই চাই...  
ছাদে জড়ভরত সন্তান, তার  
খটখটে তেষ্টায় সঙ্গ দিতে  
পুকুরে মুখ দিয়ে আমি খাই—  
জলের বদলে রক্ত—খাই...

BANGLADARSHAN.COM

## শবগাছ, হাত-মেলা মানুষ

শবগাছ, হাত-মেলা মানুষ  
তার সামনে দিয়ে জলধারা  
চলে গেছে শেষ প্রান্তে, বহুদূর ভোরের ভিতরে  
স্বল্প আলোকিতমুখ গুহাটির গলা অন্ধি জল...  
ওই পারে দিন  
এপারে সমাপ্তি কবি, যার মুখ সূর্যাস্তরঙিন!

# সমুদ্রে পা ডুবিয়ে ছপছপ

সমুদ্রে পা ডুবিয়ে ছপছপ  
যে-ধীবর হাঁটে  
মাথার টোকাটি উল্টে ধ'রে  
যে পায় টুপটাপ উল্কা। চাঁদ  
সমুদ্রের ছাদ ফুটো ক'রে  
একটি উষায় তার মাথাটি আগুন লেগে ফাটে  
তোমার ধৈর্যের ভাঙে বাঁধ  
আবার শতাব্দীকাল পরে  
রক্ত চলতে শুরু করে আমার ডানার শক্ত কাঠে...

BANGLADARSHAN.COM

## ভূপৃষ্ঠের ধাতব মলাটে

ভূপৃষ্ঠের ধাতব মলাটে  
দাঁড়িয়েছে ইস্পাতের ঘাস  
রাত্রি ঢেকে শুয়েছে আকাশ  
না-পড়া বিদ্যুৎশাস্ত্র হাতে  
ক্রীতদাস চলে যায় কারাগার হারাতে হারাতে

# আমার বিদ্যুৎমাত্র আশা

আমার বিদ্যুৎমাত্র আশা  
তার দিকে, রাত্রি হলে, ধীরে ধীরে মুখ ঘুরিয়েছে  
মেঘের পিছনে রাখা পুরোনো কামান  
কালো, গোল গলা দিয়ে উঠে আসে অগ্নিরঙ থুতু-  
বহুজনে পোড়ানো সম্মান  
কে আমার লেখা শোনে? এও রক্তমাখা ভগবান!

॥সমাপ্ত॥

BANGLADARSHAN.COM